



Br: 7/1 - 904/26 - 210

14. januar 2026.

## PLATFORMA

**za učešće potpredsjednika Vlade za međunarodne odnose i ministra vanjskih poslova mr Ervina Ibrahimovića na drugom ministarskom sastanku u okviru Balkanske mirovne platforme, Istanbul, Republika Turska, 23. januar 2026. godine**

### I UVOD

Potpredsjednik Vlade za međunarodne odnose i ministar vanjskih poslova Crne Gore mr Ervin Ibrahimović učestvovaće na drugom sastanku ministara vanjskih poslova država Zapadnog Balkana sa ministrom vanjskih poslova Republike Turske, u okviru Balkanske mirovne platforme. Sastanak će se održati u Istanbulu, Republika Turska, 23. januara 2026. godine.

Balkanska mirovna platforma (BMP), kao nova regionalna inicijativa ministara vanjskih poslova ZB i Turske, pokrenuta je na inicijativu turskog ministra vanjskih poslova Hakana Fidana. Cilj inicijative je da se uspostavi platforma za neformalan dijalog i koordinaciju među najbližim partnerima kako bi se unaprijedila regionalna saradnja, dijalog i stabilnost na Zapadnom Balkanu. Zvanično je pokrenuta na inauguracionom sastanku održanom u Istanbulu u julu 2025. godine, kojem su prisustvovali ministri vanjskih poslova i diplomatski predstavnici Albanije, Bosne i Hercegovine, Crne Gore, Kosova, Sjeverne Makedonije, Srbije i Turske. Platforma nastoji da promoviše mir i prosperitet u regionu kroz jačanje političkog dijaloga, saradnju u vezi sa zajedničkim izazovima i podršku procesu evropskih integracija. Osmišljena je kao komplementaran i inkluzivan mehanizam koji podstiče regionalno vlasništvo i saradnju, bez zamjene postojećih regionalnih inicijativa.

Nakon inauguracionog sastanka u julu 2025. godine, odlučeno je da se Balkanska mirovna platforma sastaje redovno svakih šest mjeseci u Istanbulu, na nivou ministara vanjskih poslova. Na drugom po redu sastanku Balkanske mirovne platforme očekuje se nastavak dijaloga i jačanje saradnje u rješavanju ključnih političkih i socio-ekonomskih izazova na Balkanu, s fokusom na razmatranje mogućnosti za unapređenje saradnje u oblasti povezanosti, energetske bezbjednosti i digitalizacije, omladinskih i obrazovnih politika, vojne industrije i pitanja od zajedničkog interesa u okviru evropskih integracija. Ova Platforma predstavlja značajan diplomatski napor usmjeren ka obezbjeđivanju saradnje i regionalne integracije u istorijski složenom području.

## II ZNAČAJ UČEŠĆA

Drugi ministarski sastanak Balkanske mirovne platforme predstavlja dobru priliku da ministri vanjskih poslova država Zapadnog Balkana i Turske u direktnoj komunikaciji razmijene mišljenja i stavove o mnogim pitanjima od značaja za region. Učešće ppv i.mvp Crne Gore mr Ibrahimovića na drugom ministarskom sastanku Platforme je od posebnog značaja za reafirmaciju posvećenosti Crne Gore regionalnoj saradnji, dobrosusjedskim odnosima i očuvanju stabilnosti na Zapadnom Balkanu. Kroz aktivno učešće na ovom Forumu, Crna Gora doprinosi političkom dijalogu, razmjeni iskustava i zajedničkom rješavanju regionalnih izazova, istovremeno jačajući svoju poziciju pouzdanog partnera i zagovornika evropskih integracija u regionu.

## III SASTAV DELEGACIJE

Delegaciju Crne Gore koju će predvoditi potpredsjednik Vlade za međunarodne odnose i ministar vanjskih poslova mr Ervin Ibrahimović činiće:

1. Branislav Karadžić, generalni konzul Crne Gore u Istanbulu;
2. Dragana Šćepanović, direktorica Direkcije za zajedničku vanjsku i bezbjednosnu politiku u Generalnom direktoratu za EU;
3. Jovana Duković, prva sekretarka u Kabinetu ministra vanjskih poslova.

Troškove učešća crnogorske delegacije na sastanku u Istanbulu snosi Ministarstvo vanjskih poslova.

Zadužuje se Ministarstvo vanjskih poslova da o navedenom učešću pripremi i Vladi dostavi izvještaj.